



LE GOUVERNEMENT
DU GRAND-DUCHÉ DE LUXEMBOURG
Ministère d'État

La Ministre déléguée auprès du Premier
ministre, chargée des Médias et de la
Connectivité

**Äntwert vun der delegierter Ministesch beim Premierminister fir Medien a Connectivitéit,
Elisabeth MARGUE op d'parlamentaresch Fro n° 1394 vum 18.Oktober 2024 vum
honorabelen Deputéierte Sven CLEMENT.**

Fro 1

D'Regierung begréisst d'Initiativ vum Wäissbuch vun der Europäescher Kommissioun iwwer d'Zukunft vun den digitalen Infrastrukturen vun Europa, an deelt d'Ambitioun, d'EU am Interessi vum Konsument méi kompetitiv ze maachen. D'Analys vum Wäissbuch zu der technologescher Evolutioun an den Erausforderunge fir Europa am Bezuch op den Ausbau vun ultra-héichgeschwindegkeets Konnektivitéitsnetzwierker si besonnesch relevant.

D'Europäesch Kommissioun huet all interesséiert Parteien invitéiert, d'Wäissbuch am Kader vun hirer eegener ëffentlecher Consultatioun ze kommentéieren. Den Institut Luxembourgeois de Regulation (ILR) huet sengersäits iwwer seng Websäit de Public iwwert d'ëffentlech Consultatioun vun der Kommissioun informéiert. Den Departement fir Medien, Connectivitéit an digitalen Agenda (SMC) huet d'Allgemengheet iwwer eng Informatiounscampagne op de sozialen Netzwierker duerch d'Plattform "*Innovative Initiatives*" op dës Consultatioun opmierksam gemaach.

Fro 2 bis 5

D'Regierung deelt den Avis vum „Body of European Regulators for Electronic Communications“ ("BEREC") a vum „Radio Spectrum Policy Group“ ("RSPG") zum Wäissbuch, a begréisst d'Initiativ, d'Koordinatioun vun Kalenner vun de Steeën a vun den Autorisatiounsprozedure vun neie Frequenzbänner ze stäerken. D'Regierung betruecht eng komplett Harmoniséierung vun de Frequenzprozeduren op EU-Niveau allerdengs virsiichteg. Et ass wichteg, deene technesche Spezifizitéiten, déi vu Land zu Land variéiere kënnen, Rechnung ze droen.

D'Regierung begréisst d'Propositioun vun der Kommissioun fir en europäesche Frequenzeplang a Richtung 6G op europäeschem Niveau ze verankeren, fir op dësem Wee eng harmoniséiert Notzung vun 6G an der ganzer EU ze garantéieren.

D'Applikatioun vum Prinzip "Verfall bei Netnotzung", erlaabt eng effikass an effizient Notzung vun de Frequenzen am Aklang mam europäeschen elektronesche Kommunikatiounscode.

Fro 6 a 7

D'Regierung ënnerstëtzt d'Schafe vun europäeschen Champions am Beräich vun der Telekommunikatioun mat Hëllef vun industriepolitesche Moosnamen. D'Diversitéit vu Produkter a Servicer am Interessi vum Konsument solle weider gefërdert ginn.

D'Regierung deelt d'Meenung vun der EU-Kommissioun, dass bedeitend Investitioune gebraucht gi fir eng nohalteg an zukunftssecher digital Infrastruktur ze garantéieren. D'Regierung begréisst d'Suerge vun der Kommissioun, fir d'Kaderbedéngunge fir esou Investitioune ze verbesseren. D'Kommissioun huet festgestallt, datt den Telekommunikatiounsmaart an Europa méi fragmentéiert wéi an anere Regiounen vun der Welt ass. Dofir kéint d'Ewechhuele vun onnéidege reglementaresche Barrièren hëllefen, Investitioune an Telekommunikatiounsnetzwerker an der EU méi attraktiv ze machen, an domat nei Wuesstemsméiglechkeeten opzemaachen.

Fro 8

2022 huet d'Regierung d'Emissioun vu Konnektivitéitsgutschäiner zu Lëtzebuerg agefouert. E Beneficiaire vun der „Allocation de vie chère“ ka vun enger Remise vun 10 Euro de Mount op sengem Festnetzinternetabonnement, deen op der Adress vu senger Haaptresidenz ugemellt ass, profitéieren. Dës Remise ka bei engem Internetbedreiwer vu senger Wiel, no Empfang vu sengem Konnektivitéitsbong, ugefrot ginn. All Stot, deen „d'Allocation de vie chère“ kritt, ka vun dëser Remise profitéieren.

Fro 9 a 10

D'Regierung deelt dem BEREC seng Meenung, dass *d'ex ante* Regulatioun sech bewisen huet fir den Telekommunikatiounsmaart opzemaachen an d'Konkurrenz an d'Konsumentewiel ze fërderen. Den Iwwergang vun enger *ex ante* op eng *ex post* Approche erfuerdert eng suergfältig Impaktstudie. Am Moment ass et ze fréi fir d'Konsequenzen an den Impakt vum Hierkonftlandprinzip, a vum Paradigmewiessel vun enger *ex ante* Regulatioun op eng *ex post* Regulatioun ze bewäerten.

Lëtzebuerg, den 13. November 2024

Déi delegéiert Ministesch beim Premierminister
fir Medien a Connectivitéit
(s.) Elisabeth MARGUE